

Manfred Zirkelbach

MaZi-Ned auszudenke

En Nikolaus senn Truck

Heüd o senn Nomensdooch hadd där heilich Nikolaus jo widder sei Ärwed, wäll där alle Kinner off e Moal besüch muess. Ower här schaffds ömmer widder. Do derzu haddr nämlich in Schönää en Bulldogg mid e Hängele hinnedro, äüße römm mid Lichdlich, so e himmlisch Papamobil hald.

On wäll där Nikolaus vom Himmel owe roo kömmd, muess här aach Eng-lisch könn, kee Frooch. Wie für ogefähr zwanzich Johr die Ami noch do bei uns in die Rhüe worn, is där Nikolaus aach zu e amerikanisch Familie eigelode worn. So, so, hadd där Nikolaus dehemm sinnierd, wie mach ich jetz rasch so en Kräschkursch off Eng-lisch. Här hadd sich also vo e Nochberschmädle, des wu in Neüschd nei es Gimnasium gange is, e boor Sätz aufschreib läss on die Aüsschbrooch geübd. On dann is loes gange, zu die Schdube nei, wu där klee Bob scho sehnlichsd gward hadd.

„Gudd iwening, nau camms neis haus, dr holi tschörmen Nickelaus“. Gschwidzt hadd där Nikolaus, ower här hadd brov sei Sätz rogerasseld, obs nu zommgebassd hadd odr aach ned. Des wor ower dem Bob dodal wurschd, wäll där sich nämlich gewonnerd hadd däss der Sânta Kloos durch die Tür reikomme is on ned wie bei die Ami durch den Tschimeni roo gerombeld is.

Ower dann is äusn räusgebroche: „Where are your rentiers?“. Antwort Nikolaus: „Dause bifor die door“. Där Bob wor nix mer ze halle, o en Nikolaus vorbei, zu die Tür näus on do schdand här, där Lichdlichsbulldog: „Ooooh very nice, e truck“. Sowos hadd där Bob no ned gsenn, on wie där Nikolaus off sei Hängele gschdieche is, huldvoll gewonke hadd, worn die rentiers vergesse.

Där Bob mössed heüd so ogefähr 25 Joahr ald sei on ich honn des Gfühl, däss där sei Schönääer Sânta-Kloos Erlebnis wedder verzähld hadd do düwe in Amerika. Wie annerschd wärsch süssd zu erklärn, däss där Ami-Kloos heüzedooch nix mer mid sei Rentiere ower mid en Riesen-Truck dohäre kömmd.

Ned auszudenke